

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 23 MAC 2023, PUKUL 10.00 PAGI

Bil. 12

WAKTU PERTANYAAN-PERTANYAAN MENTERI

1. PR-1521-MQT2142
Tuan Syed Saddiq bin Syed Abdul Rahman [Muar] minta **MENTERI KEMAJUAN DESA DAN WILAYAH** menyatakan berdasarkan cadangan yang timbul baru-baru ini untuk mewujudkan Maktab Rendah Sains Mara (MRSM) berbayar kepada golongan yang berkemampuan, mohon menteri jelaskan :
 - (a) apakah proses dan sumber pendanaan untuk membina MRSM berbayar ini dan bilakah ia akan dilaksana; dan
 - (b) bagaimanakah proses pemilihan pelajar untuk kemasukan ke sekolah MRSM berbayar ini.
2. PR-1521-MQT2131
Dato' Ahmad bin Saad @ Yahaya [Pokok Sena] minta **PERDANA MENTERI** menyatakan asas pertimbangan Kerajaan meletakkan kos perbelanjaan jemaah haji berdasarkan kategori pendapatan B40, M40 dan T20.
3. PR-1521-MQT2125
Puan Young Syefura binti Othman [Bentong] minta **PERDANA MENTERI** menyatakan berapa banyak kes kesalahan seksual terhadap kanak-kanak telah dilaporkan, didakwa dan diselesaikan sejak Akta Kesalahan-Kesalahan Terhadap Kanak-Kanak 2017 dikuatkuasakan, dan apakah rancangan dan usaha Kerajaan untuk membanteras kes-kes sebegini sekaligus menambah baik sistem keadilan jenayah kanak-kanak.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 23 MAC 2023, PUKUL 10.00 PAGI

Bil. 25

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1521-L18973
Datuk Seri Panglima Madius Tangau [Tuaran] minta **MENTERI PENGANGKUTAN** menyatakan apakah sebenarnya yang terjadi dengan Kapal Kargo Malaysia MV Dai Cat 06 yang dilaporkan hilang pada awal Januari 2023 di perairan Indonesia dan apakah penyelesaian kehilangan kapal tersebut.
2. PR-1521-L19375
Dato' Dr. Alias bin Razak [Kuala Nerus] minta **MENTERI KESIHATAN** menyatakan sama ada Kerajaan mempunyai perancangan untuk membina *parking* bertingkat di seluruh hospital Kerajaan bagi menyelesaikan isu kekurangan tempat letak kereta yang kritikal di kawasan tersebut.
3. PR-1521-L18023
Datuk Seri Ir. Dr. Wee Ka Siong [Ayer Hitam] minta **MENTERI DALAM NEGERI** menyatakan bilakah pindaan Perlembagaan Persekutuan dapat dibuat bagi membolehkan anak yang dilahirkan di luar negara oleh wanita warganegara Malaysia yang berkahwin dengan warga asing diberi kewarganegaraan automatik.

4. PR-1521-L18373
Tuan Mohd Azizi bin Abu Naim [Gua Musang] minta **MENTERI KEMAJUAN DESA DAN WILAYAH** menyatakan apakah rancangan Kerajaan bagi pembangunan kawasan pos Orang Asli dan kampung-kampung tradisional di pedalaman Kelantan Selatan dari segi infrastruktur awam terutamanya jalan berturap dalam jangka pendek, jangka sederhana dan jangka panjang bagi menjaga kebajikan masyarakat di penempatan tersebut.
5. PR-1521-L18754
Tuan Chong Zhemin [Kampar] minta **MENTERI PEMBANGUNAN KERAJAAN TEMPATAN** menyatakan jumlah projek perumahan terabai secara terperinci dan jumlah GDV (*Gross Development Value*) yang terkini dan apakah langkah-langkah yang diambil untuk menyelesaikan masalah ini.
6. PR-1521-L19331
Dato' Haji Abdul Khalib bin Abdullah [Rompin] minta **MENTERI BELIA DAN SUKAN** menyatakan apakah perancangan yang dilakukan dalam usaha mencari bakat-bakat baharu sukan bagi permainan yang popular (contohnya badminton, bola sepak dan lain-lain) sebagai pelapis untuk kemajuan sukan di Malaysia.
7. PR-1521-L18802
Tuan Syed Saddiq bin Syed Abdul Rahman [Muar] minta **MENTERI SUMBER MANUSIA** menyatakan penangguhan pelaksanaan Perintah Gaji Minimum (PGK) yang sepatutnya sudah mula berkuatkuasa pada 1 Januari 2023 khususnya apabila ada majikan yang masih menggunakan gaji minimum yang lama terutama sekali bagi pekerja keselamatan dan pembersihan.
8. PR-1521-L18826
Tuan Wan Razali bin Wan Nor [Kuantan] minta **MENTERI KESIHATAN** menyatakan tindakan kawalan dan pencegahan jangkitan HIV dalam kalangan pelajar di sekolah menengah dan peringkat institut pengajian tinggi.

9. PR-1521-L18368
Tuan Tan Hong Pin [Bakri] minta **MENTERI PEMBANGUNAN KERAJAAN TEMPATAN** menyatakan adakah Kementerian bersedia membuat semakan semula mengenai Pelan Pelupusan Sisa Pepejal Negeri Johor 2020-2050 dengan mewujudkan kemudahan pengurusan sisa pepejal tempatan/modular mengikut daerah bagi menggantikan pelan asal dengan kemudahan pengurusan sisa pepejal secara berpusat untuk mengurangkan isu tapak haram dan kos pengurusan sisa pepejal.
10. PR-1521-L19208
Tuan Wan Ahmad Fayhsal bin Wan Ahmad Kamal [Machang] minta **MENTERI KEMAJUAN DESA DAN WILAYAH** menyatakan sama ada GIATMARA ada perancangan untuk membina sebuah kemudahan lengkap di sebuah premis kekal untuk GIATMARA Machang beroperasi memandangkan Menteri telah memberi komitmen untuk melaksanakan TVET berimpak tinggi secara besar-besaran.
11. PR-1521-L18329
Tuan Jimmy Puah Wee Tse [Tebrau] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan jumlah atau peratusan rakyat Malaysia yang mempunyai akses kepada air paip yang bersih pada setiap masa dan bagaimana Kementerian bercadang untuk memastikan peratusan ini mencapai 100% terutamanya ke kawasan pedalaman dan perkampungan Orang Asli.
12. PR-1521-L18392
Tuan Kalam bin Salan [Sabak Bernam] minta **MENTERI BELIA DAN SUKAN** menyatakan bila peruntukan khas dan segera memperbaiki infrastruktur sukan seperti gelanggang futsal yang tidak pernah diperbaiki sejak siap dibina di kampung-kampung. Kerosakan ini jika tidak segera diperbaiki boleh mengundang bahaya kecederaan kepada penggunaanya ataupun menjadi tempat pembiakan nyamuk dan serangga bahaya lain termasuk anjing liar dan lain-lain.
13. PR-1521-L18490
Dato' Haji Adnan bin Haji Abu Hassan [Kuala Pilah] minta **MENTERI SUMBER MANUSIA** menyatakan faktor utama yang menyumbang kepada kadar pengangguran terkini serta perancangan Kementerian untuk menyelesaikannya.

14. PR-1521-L19233

Tuan Mohd Syahir bin Che Sulaiman [Bachok] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan perancangan jangka pendek dan jangka panjang Kementerian untuk membina struktur pengawalan hakisan pantai di kawasan Parlimen P.025 Bachok yang bagi mengatasi permasalahan hakisan yang semakin teruk setiap kali musim tengkujuh seterusnya menjejaskan aktiviti nelayan dan penempatan penduduk.

15. PR-1521-L18342

Puan Vivian Wong Shir Yee [Sandakan] minta **MENTERI DALAM NEGERI** menyatakan apakah strategi Kerajaan untuk menjaga keselamatan sempadan negara kita di Pantai Timur Sabah supaya perintah berkurung di perairan kawasan itu yang sedang dilaksanakan ketika ini tidak akan disambung selama-lamanya.

16. PR-1521-L19133

Dato' Seri Dr. Shahidan bin Kasim [Arau] minta **MENTERI BELIA DAN SUKAN** menyatakan :

- (a) statistik terkini bilangan belia di Perlis mengikut Parlimen; dan
- (b) apakah Kementerian berhasrat untuk melibat urus secara berterusan dengan pihak berkuasa tempatan (PBT) dan pemimpin tempatan bagi membina lebih banyak mini kompleks sukan awam atau *One Stop Centre* bagi golongan belia berkumpul khususnya di Arau berdasarkan Pelan Rancangan Malaysia Ke-12 (RMK-12).

17. PR-1521-L17964

Datuk Jonathan Yasin [Ranau] minta **MENTERI DALAM NEGERI** menyatakan bilakah Balai Polis Kecil Kundasang akan dibina memandangkan tapak untuk pembinaan balai polis kecil ini sudah pun dikenal pasti lokasinya.

18. PR-1521-L18787

Datuk Haji Awang bin Hashim [Pendang] minta **MENTERI SUMBER MANUSIA** menyatakan apakah tindakan yang telah diambil oleh pihak Kerajaan dalam menangani masalah ketidaksepadanan pekerjaan untuk siswazah selain memastikan peluang pekerjaan dikawal selia serta dibuka untuk semua golongan yang mencari pekerjaan.

19. PR-1521-L18400
Tuan Edwin anak Banta [Selangau] minta **MENTERI KEMAJUAN DESA DAN WILAYAH** menyatakan status terkini projek menaik taraf Loji Air Sekuau, Selangau, Bahagian Sibu, Sarawak yang telah diumumkan semasa lawatan PM6 ke Sekuau pada tahun 2016.
20. PR-1521-L19049
Tuan Haji Wan Hassan bin Mohd Ramli [Dungun] minta **MENTERI BELIA DAN SUKAN** menyatakan apakah ada perancangan pembinaan sebuah stadium mini berkapasiti 20,000 orang untuk rakyat Dungun kerana Dungun merupakan satu-satunya daerah yang masih belum mempunyai stadium mini walaupun Dungun telah melahirkan atlet bola sepak negeri dan negara seperti arwah Ariffin Osman (Terengganu), Muhammad Safawi Rasid (Malaysia), Alif Mat Amin (Pahang Rangers) dan Amar Makruf Sharuddin (*AD Alcorcon Sepanyol*).
21. PR-1521-L18665
Puan Yeo Bee Yin [Puchong] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan langkah-langkah Kementerian untuk mengatasi masalah pengimportan haram e-waste dan kilang-kilang haram pemprosesan e-waste yang semakin berleluasa.
22. PR-1521-L18867
Tuan Nurul Amin bin Hamid [Padang Terap] minta **MENTERI KEMAJUAN DESA DAN WILAYAH** menyatakan apakah keperluan melantik Jawatankuasa Pembangunan dan Keselamatan Kampung Persekutuan (JPKKP) di negeri-negeri yang bukan ditadbir oleh parti yang memerintah Kerajaan Persekutuan.
23. PR-1521-L19181
Tuan Tan Kar Hing [Gopeng] minta **MENTERI PEMBANGUNAN KERAJAAN TEMPATAN** menyatakan perancangan Kerajaan Persekutuan setelah berlaku insiden tanah runtuh di *camp site* Batang Kali. Adakah Kerajaan akan mewujudkan punca kuasa yang lebih menyeluruh bagi meletakkan syarat-syarat pengeoperasian *resort*, *camp site*, *glamping site* dan lain-lain di luar daripada kategori penginapan hotel.
24. PR-1521-L18969
Tuan Muhammad Ismi bin Mat Taib [Parit] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan inisiatif yang dilakukan oleh Kementerian berkenaan sepanjang jajaran Sungai Perak di dalam daerah Perak Tengah yang menghadapi masalah hakisan tebing.

25. PR-1521-L18321
Puan Isnaraissah Munirah Majilis [Kota Belud] minta **MENTERI KEMAJUAN DESA DAN WILAYAH** menyatakan projek-projek yang akan disegerakan bagi mengatasi masalah bekalan air dan banjir di Kota Belud.
26. PR-1521-L18700
Tuan Roy Angau anak Gingkoi [Lubok Antu] minta **MENTERI BELIA DAN SUKAN** menyatakan bagaimanakah Kementerian merancang untuk menerapkan elemen Malaysia Madani dalam usaha ke arah pembangunan belia dan sukan yang holistik serta usaha meningkatkan penglibatan belia di kawasan luar bandar dalam aktiviti dan program Kementerian agar mereka sentiasa cakna mengenai pelbagai latihan, bantuan dan peluang yang disediakan oleh pelbagai jabatan dan agensi Kerajaan.
27. PR-1521-L18717
Dr. Kelvin Yii Lee Wuen [Bandar Kuching] minta **MENTERI KESIHATAN** menyatakan jumlah peratusan vaksinasi termasuk dos ke-4 di seluruh negara. Selain itu, berapa jumlah vaksin yang masih ada dan bila stok tersebut akan mencapai tarikh luput dan perancangan Kementerian untuk stok tersebut termasuk pelan untuk membeli vaksin *bi-valent*.
28. PR-1521-L19432
Dr. Richard Rapu @ Aman anak Begri [Betong] minta **MENTERI KESIHATAN** menyatakan usaha dan perancangan Kementerian bagi menentukan perkhidmatan kesihatan, kelengkapan dan infrastruktur serta keperluan sumber manusia di Hospital Betong dapat ditambah bagi menampung keperluan pesakit yang telah meningkat.
29. PR-1521-L18634
Puan Rodiyah binti Sapiee [Batang Sadong] minta **MENTERI KESIHATAN** menyatakan bilakah naik taraf Klinik Kesihatan (KK) Semera dan KK Sadong Jaya serta Hospital Simunjan dapat dilaksanakan dengan segera dalam Rancangan Malaysia Ke-12 (RMK-12).
30. PR-1521-L19002
Dr. Siti Mastura binti Muhammad [Kepala Batas] minta **MENTERI KESIHATAN** menyatakan :
- (a) adakah terdapat langkah untuk menaik taraf Hospital Kepala Batas kepada Hospital Berpakar Penuh berbanding nisbah penduduk di Kepala Batas terkini ; dan
 - (b) adakah pihak Kementerian bersetuju untuk menambah bilangan penjawat, wad dan lain-lain kemudahan Hospital Kepala Batas.

31. PR-1521-L19403

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status kemajuan projek pembinaan pam air bagi mengatasi masalah banjir di Kuala Sepetang dan status permohonan kelulusan RM70 juta bagi Rancangan Tebatan Banjir Sungai Larut Fasa 2, Parlimen Bukit Gantang yang terletak dalam Daerah Larut Matang dan Selama.

32. PR-1521-L18629

Dato' Ngeh Koo Ham [Beruas] minta **MENTERI KESIHATAN** menyatakan kenapa Kerajaan mengiktiraf Lembaga Kepakaran Amerika Syarikat seperti *American Board of Internal Medicine* tetapi tidak mengiktiraf *American Board of Family Medicine*.

33. PR-1521-L18765

Dato' Hajah Mumtaz binti Md Nawi [Tumpat] minta **MENTERI KESIHATAN** menyatakan sejauh manakah Dasar Pemakanan Kebangsaan Malaysia 2.0 berjaya membentuk rakyat agar mengambil makanan yang berkhasiat dan seimbang seterusnya mengubah gaya hidup masyarakat menjadi aktif dan sihat.

34. PR-1521-L18570

Puan Teresa Kok Suh Sim [Seputeh] minta **MENTERI SUMBER MANUSIA** menyatakan bilangan pekerja domestik Indonesia telah datang bekerja di Malaysia melalui '*One Channel System*'. Apakah gaji minima dan kebajikan pekerja domestik di bawah perjanjian di antara Kerajaan Malaysia dan Indonesia dan cara Kerajaan memantau pengawasan tarif fi agensi Malaysia dan agensi Indonesia.

35. PR-1521-L19425

Tuan Zahir bin Hassan [Wangsa Maju] minta **MENTERI PEMBANGUNAN KERAJAAN TEMPATAN** menyatakan :

- (a) berapa dan peratusan rumah yang sudah siap dan sedang dalam pembinaan yang masih belum terjual; dan
- (b) langkah Kementerian bagi menangani keadaan tidak sepadan (*mismatch*) antara jenis rumah yang dirancang dan dibina dengan jenis rumah atas permintaan.

36. PR-1521-L19452

Tuan Onn bin Abu Bakar [Batu Pahat] minta **MENTERI KESIHATAN** menyatakan terdapat banyak kekosongan jawatan yang belum diisi khususnya bagi jawatan tetap pegawai perubatan (dokter). Dicadangkan pengisian jawatan tersebut memberikan keutamaan kepada doktor kontrak yang telah lama berkhidmat. Apakah langkah pengisian jawatan tersebut telah memberi keutamaan kepada mereka.

37. PR-1521-L19091

Tuan Shaharizukirnain bin Abd. Kadir [Setiu] minta **MENTERI KESIHATAN** menyatakan :

- (a) apakah yang diambil oleh Kementerian bagi menyelesaikan isu doktor pelatih bekerja berterusan sehingga melebihi 24 jam; dan
- (b) apakah langkah Kerajaan dalam membawa pulang siswazah perubatan yang bekerja di luar negara selepas menamatkan pengajian di negara tersebut.

38. PR-1521-L19460

Tuan Lim Lip Eng [Kepong] minta **MENTERI PEMBANGUNAN KERAJAAN TEMPATAN** menyatakan rancangan Kementerian mengatasi masalah tandas awam yang tidak mencukupi di destinasi pelancongan popular di seluruh negara. Bagaimanakah kualiti fasiliti dan perkhidmatan tandas awam dikawal.

39. PR-1521-L18991

Datuk Haji Idris bin Haji Ahmad [Bagan Serai] minta **MENTERI PEMBANGUNAN KERAJAAN TEMPATAN** menyatakan adakah Kerajaan di bawah Syarikat Perumahan Negara Berhad (SPNB) berhasrat menambah projek perumahan rakyat mampu milik terutama di kawasan luar atau separa bandar seperti di Bagan Serai.

40. PR-1521-L18468

Datuk Seri M. Saravanan [Tapah] minta **MENTERI SUMBER MANUSIA** menyatakan adakah Kementerian akan terus meminta PERKESO meneliti bagi mewujudkan perancangan untuk mengubah caruman Pertubuhan Keselamatan Sosial (PERKESO) supaya menjadi skim pencen bagi memastikan pekerja sektor swasta memiliki jaringan keselamatan selepas bersara serta kemungkinan meningkatkan caruman PERKESO bagi mereka di sektor swasta dan mengubahnya sebagai skim pencen selepas mereka mencapai usia 60 tahun.

41. PR-1521-L18240
Tuan Haji Yusuf bin Abd. Wahab [Tanjong Manis] minta **MENTERI PENGANGKUTAN** menyatakan bilakah Kerajaan akan memulakan kerja-kerja pengorekan untuk mendalamkan muara Batang Rajang di Tanjong Manis seperti yang telah diluluskan oleh Kerajaan sebelum ini. Kawasan ini mengalami masalah keketekan muara dan membahayakan pelayaran kapal keluar dan masuk ke Pelabuhan Tanjong Manis.
42. PR-1521-L18685
Dato' Seri Dr. Wan Azizah Wan Ismail [Bandar Tun Razak] minta **MENTERI KESIHATAN** menyatakan apakah langkah menyeluruh yang akan atau sedang dilaksanakan terhadap isu kesihatan mental yang semakin meruncing yang mana ada di antara mereka yang tidak didiagnos dengan kemurungan tetapi menghadapi tekanan yang kuat dalam kehidupan seharian, seperti di tempat kerja atau lain-lain.
43. PR-1521-L18118
Dato' Sri Dr. Haji Ismail bin Haji Abd. Muttalib [Maran] minta **MENTERI KESIHATAN** menyatakan sehingga kini sejauh manakah tindakan Kementerian dalam usaha menyegerakan pelaksanaan pembinaan Hospital Maran yang telah diluluskan sejak RMK-11 lagi.
44. PR-1521-L18010
Tuan Sanisvara Nethaji Rayer A/L Rajaji [Jelutong] minta **MENTERI PENGANGKUTAN** menyatakan langkah-langkah sedang diambil untuk mengubah suai dan menambah baik Lapangan Terbang Antarabangsa Pulau Pinang yang mula menerima kunjungan pelancong yang semakin meningkat kebelakangan ini.
45. PR-1521-L18609
Tuan Prabakaran A/L M Parameswaran [Batu] minta **MENTERI DALAM NEGERI** menyatakan apakah kriteria yang telah diguna pakai oleh pihak Kementerian untuk meluluskan hampir 7,000 taraf kewarganegaraan pada awal Januari 2023 dan bagaimana pula proses dan penapisan untuk kira-kira 36,000 permohonan lain.
46. PR-1521-L17987
Kapten Dato' Dr. Zulkafperi bin Hanapi (Bersara) [Tanjong Karang] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan bilakah benteng pemecah/penahan ombak kekal di pantai Sungai Kajang dapat dilaksanakan. Difahamkan bajet sebesar RM12 juta telah diperuntukkan sejak 2019. Keadaan sangat merbahaya kepada 233 orang keluarga di Kg. Baru Lembah Pantai yang diancam banjir akibat benteng yang pecah berulang-ulang.

47. PR-1521-L18015

Tuan William Leong Jee Keen [Selayang] minta **MENTERI PEMBANGUNAN KERAJAAN TEMPATAN** menyatakan sama ada suatu jabatan Kerajaan akan ditubuhkan untuk mengurus dan menyelenggara apartmen kos rendah untuk menangani masalah JMB yang gagal berfungsi dan tidak mempunyai dana yang mencukupi untuk memperbaiki kerosakan harta bersama dan untuk penyelenggaraan lif.

48. PR-1521-L19003

Datuk Andi Muhammad Suryady bin Bandy [Kalabakan] minta **MENTERI PEMBANGUNAN KERAJAAN TEMPATAN** menyatakan apakah bentuk kerjasama komprehensif dan strategik yang boleh disalurkan oleh pihak Kementerian kepada Kerajaan Negeri Sabah di dalam merealisasikan usaha untuk membangunkan empat buah daerah di Sabah iaitu Tawau, Sipitang, Nabawan dan Kalabakan terutamanya sebagai sebuah bandar sempadan yang lestari, berdaya huni dan sejahtera.

49. PR-1521-L19417

Puan Young Syefura binti Othman [Bentong] minta **MENTERI PEMBANGUNAN KERAJAAN TEMPATAN** menyatakan perancangan :

- (a) pembinaan Balai Bomba dan Penyelamat Gred D di kawasan Pelangai dan Bukit Tinggi yang menjadi kawasan *hotspot* banjir dan kemalangan; dan
- (b) penambah baik dan naik taraf logistik pasukan Bomba dan Penyelamat Bentong dan Karak.

50. PR-1521-L(5)00151

Dato' Ramanan Ramakrishnan [Sungai Buloh] minta **MENTERI PEMBANGUNAN KERAJAAN TEMPATAN** menyatakan apakah strategi bagi memastikan pembangunan perumahan di seluruh negara adalah lebih seimbang dan tidak dimanipulasi oleh pemaju dan memudaratkan pembeli.

[Pertanyaan di bawah PM 22(5)]

51. PR-1521-L18170

Tuan M. Kulasegaran [Ipoh Barat] minta **MENTERI SUMBER MANUSIA** menyatakan :

- (a) bilangan pelajar yang belajar di Institut Latihan Perindustrian (ILP) dengan mengikut kaum dari tahun 2017 hingga tahun 2023; dan
- (b) nyatakan kapasiti maksimum pelajar yang boleh belajar di ILP dan jumlah pengambilan pelajar ILP untuk tahun ini.

52. PR-1521-L(5)00153

Tuan Lee Chean Chung [Petaling Jaya] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan sebab senarai laporan EIA bagi tahun 2022 tidak lengkap pada laman web <http://ekas.doe.gov.my> serta tempoh masa ia akan dilengkapi dan senarai penuh semua laporan EIA yang diterima oleh Jabatan Alam Sekitar pada tahun 2018, 2019, 2020.

[Pertanyaan di bawah PM 22(5)]

53. PR-1521-L18529

Datuk Suhaimi bin Nasir [Libaran] minta **MENTERI KEMAJUAN DESA DAN WILAYAH** menyatakan apakah langkah yang diambil oleh Kementerian bagi menaik taraf jalan-jalan kampung, bekalan air dan bekalan elektrik di luar bandar Sabah.

54. PR-1521-L18726

Dr. Kelvin Yii Lee Wuen [Bandar Kuching] minta **MENTERI KESIHATAN** menyatakan tentang pelan Kementerian untuk meningkatkan kapasiti pendigitalan di setiap premis kesihatan seluruh negara.

55. PR-1521-L(5)00158

Tuan Haji Muhammad Islahuddin bin Abas [Mersing] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan sejauh manakah komitmen Kementerian dalam memastikan kelestarian biodiversiti marin di Taman Laut terpelihara daripada sebarang pencemaran dan kepupusan habitat yang akan merugikan negara.

[Pertanyaan di bawah PM 22(5)]

56. PR-1521-L18208

Tuan Mohd Sany bin Hamzan [Hulu Langat] minta **MENTERI PEMBANGUNAN KERAJAAN TEMPATAN** menyatakan apakah usaha Kerajaan mengatasi masalah banjir warga asing yang berniaga kedai runcit, kedai makan dan di pasar-pasar sehingga menghalang penduduk tempatan untuk berniaga.

57. PR-1521-L18288

Dato' Seri Amirudin bin Shari [Gombak] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan :

- (a) peruntukan baharu projek mitigasi banjir khususnya di negeri Selangor; dan
- (b) status permohonan Kerajaan bagi Dana Program Ketersediaan (Readiness Programme, Green Climate Fund) bagi tujuan mengadaptasi kepada cabaran perubahan iklim.

58. PR-1521-L19067

Tuan Mohamad Shafizan Haji Kepli [Batang Lupar] minta **MENTERI DALAM NEGERI** menyatakan jumlah tangkapan dan langkah yang diambil oleh pihak Polis Diraja Malaysia dan Suruhanjaya Komunikasi dan Multimedia bagi membanteras kegiatan judi atas talian serta tindakan yang diambil ke atas iklan dan promosi judi atas talian di laman-laman sosial dan sistem pesanan ringkas (SMS).

59. PR-1521-L19383

Tuan Syed Ibrahim bin Syed Noh [Ledang] minta **MENTERI PENGANGKUTAN** menyatakan punca dan masalah yang wujud bagi isu kerosakan prasarana kemudahan awam.

60. PR-1521-L18083

Datuk Seri Utama Hasni bin Mohammad [Simpang Renggam] minta **MENTERI SUMBER MANUSIA** menyatakan apakah langkah-langkah awalan Kerajaan untuk memastikan gaji permulaan para graduan institut pengajian tinggi dalam pelbagai bidang setimpal dengan kos sara hidup semasa.

61. PR-1521-L(5)00173

Tuan Ganabatirau A/L Veraman [Klang] minta **MENTERI SUMBER MANUSIA** menyatakan adakah benar bahawa pengambilan pekerja warga asing bagi sektor-sektor yang dimonopoli oleh kaum India seperti bidang tukang gunting, tukang emas dan kedai tekstil India adalah tidak dibenarkan. Kalau benar mengapa ianya tidak dibenarkan. Mohon pencerahan.

[Pertanyaan di bawah PM 22(5)]

62. PR-1521-L17970

Tuan Chow Kon Yeow [Batu Kawan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan pendekatan yang telah dilaksanakan serta dirancang Kerajaan dalam menjamin bekalan air di Wilayah Ekonomi Koridor Utara (NCER) sehingga tahun 2050. Apakah maklum balas penubuhan Lembaga Lembangan Ulu Muda (UMBA) menerusi surat saya bertarikh 30 Mac 2021 kepada YAB Perdana Menteri ketika itu dan 24 Ogos 2022 kepada Ketua Setiausaha Negara.

63. PR-1521-L18751

Tuan Hassan bin Saad [Baling] minta **MENTERI SUMBER MANUSIA** menyatakan pelan tindakan dalam meningkatkan kebolehpasaran pelajar tahfiz melalui Program TVET Tahfiz.

64. PR-1521-L18513

Dato' Seri Haji Aminuddin bin Harun [Port Dickson] minta **MENTERI KEMAJUAN DESA DAN WILAYAH** menyatakan adakah terdapat peruntukan penyelenggaraan sampah di kawasan luar bandar (kampung tradisi) kerana pembuangan sampah yang tidak terurus menyebabkan pencemaran yang serius.

65. PR-1521-L19321

Tuan Lee Chuan How [Ipoh Timur] minta **MENTERI KESIHATAN** menyatakan peratusan bulanan kes serangan jantung yang di luar hospital, yang diperhatikan oleh perkhidmatan ambulans Kementerian Kesihatan Malaysia, di mana Resusitasi Kardiopulmonari (CPR) tidak diberikan, daripada Januari 2013 sehingga Disember 2022.

66. PR-1521-L18101

Dato' Sri Dr. Wee Jeck Seng [Tanjung Piai] minta **MENTERI DALAM NEGERI** menyatakan apakah langkah yang diambil untuk mengatasi kesesakan urusan di pintu masuk kastam Malaysia – Singapura yang selalu menjadi rungutan pihak yang terlibat berurusan di sana agar masalah tersebut dapat di atasi.

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2023 (D.R.2/2023) dan Usul Anggaran Perbelanjaan Pembangunan 2023 seperti berikut :**

“Bahawa Dewan ini, menurut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa suatu jumlah wang sebanyak tidak lebih dari sembilan puluh sembilan bilion ringgit (RM99,000,000,000) dibelanjakan daripada Kumpulan Wang Pembangunan bagi tahun 2023, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2023, yang dibentangkan sebagai Kertas Perintah 19 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersementaraan dengan butiran-butiran itu di ruangan enam dan tujuh senarai tersebut, dan bahawa Usul yang telah diluluskan oleh Dewan ini pada 20 Disember 2022 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2023 adalah dibatalkan dan hendaklah disahkan.”

Dalam Jawatankuasa Sebuah-buah Majlis (22 Mac 2023)

- | | | | |
|----|----------------|--|-----------------------------------|
| 2. | (D.R 4/2023) | Rang Undang-Undang Kewangan 2023

[Menteri Kewangan] | Bacaan Kali
Yang Kedua |
| 3. | (D.R 3/2023) | Rang Undang-Undang Levi Keuntungan Luar Biasa (Pengesahan) 2023

[Menteri Kewangan] | “ |
| 4. | (D.R 1/2023) | Rang Undang-Undang Pencetakan Teks Al-Qur'an (Pindaan) 2023.

[Menteri Dalam Negeri] | “ |
| 5. | (D.R 5/2023) | Rang Undang-Undang Kanun Keseksaan (Pindaan) 2023.

[Perdana Menteri] | “ |
| 6. | (D.R 6/2023) | Rang Undang-Undang Kanun Tatacara Jenayah (Pindaan) 2023.

[Perdana Menteri] | “ |

7. **Menteri Kewangan** akan mencadangkan :

"Bahawa Dewan ini, mengikut peruntukan perenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan) membuat pelaburan dengan menukar baki pinjaman Kerajaan Malaysia sebanyak RM165,282,814.00 kepada UDA Holding Berhad (UDA), sebuah syarikat dimiliki sepenuhnya oleh Menteri Kewangan (Diperbadankan) kepada ekuti (modal saham) bersamaan Seratus Enam Puluh Lima Juta Dua Ratus Lapan Puluh Dua Ribu Lapan Ratus Empat Belas (165,282,814) unit saham biasa pada nilai RM1 bagi satu unit saham."

8. PR-1521-U(27)231

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656 km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

[Menteri Dalam Negeri]

9. PR-1521-U(27)232

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan mentah tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan mentah makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

10. PR-1521-U(27)233

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Menteri Pembangunan Kerajaan Tempatan]

11. PR-1521-U(27)234

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

[Menteri Ekonomi]

12. PR-1521-U(27)235

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

13. PR-1521-U(27)236

Dato' Seri Dr. Shahidan bin Kasim [Arau] akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah

dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Perdana Menteri]

14. PR-1521-U(27)237

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

15. PR-1521-U(27)238

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

[Menteri Komunikasi dan Digital]

16. PR-1521-U(27)239

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

17. PR-1521-U(27)240

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

[Menteri Pertanian dan Keterjaminan Makanan]

18. PR-1521-U(27)241

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

[Perdana Menteri]

19. PR-1521-U(27)242

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

[Menteri Pertanian dan Keterjaminan Makanan]

20. PR-1521-U(27)243

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

21. PR-1521-U(27)244

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah

rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

22. PR-1521-U(27)245

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan.

Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebu Raya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

23. PR-1521-U(27)225

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan didalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

[Perdana Menteri]

24. PR-1521-U(27)226

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

[Menteri Pertanian dan Keterjaminan Makanan]

25. PR-1521-U(27)227

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

[Menteri Ekonomi]

26. PR-1521-U(27)228

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, bancian daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para nelayan dengan memberi alasan hasil yang berkurangan disebabkan oleh cuaca buruk dan secara tidak langsung memberikan kesan negatif kepada rantai sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada golongan-golongan yang tidak mahir menggunakan kemudahan internet dan agensi berkaitan haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu. "

[Menteri Pertanian dan Keterjaminan Makanan]

27. PR-1521-U(27)229

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcaj sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.

Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

[Menteri Sumber Asli, Alam Sekitar dan Perubahan Iklim]

28. PR-1521-U(27)230

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

[Menteri Perpaduan Negara]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST. 58	Laporan Tahunan dan Penyata Kewangan Suruhanjaya Tenaga Bagi Tahun 2021 (Telah Diaudit)	23 Mac 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 23.03.2023 (Khamis)	1. YB Puan Young Syefura binti Othman (Bentong)	1. Pembinaan dan Naik Taraf Logistik Balai Bomba dan Penyelamat	1. YB Menteri Pembangunan Kerajaan Tempatan
2. 23.03.2023 (Khamis)	2. YB Puan Young Syefura binti Othman (Bentong)	2. Bekalan Air yang sering Terputus akibat Paip Lama dan Uzur yang Pecah	2. YB Menteri Sumber Asli, Alam Sekitar dan Perubahan Iklim
3. 23.03.2023 (Khamis)	3. YB Tuan Shahrizukir bin Abd. Kadir (Setiu)	3. Kerja-kerja Mendalamkan Muara Sungai Merang, Setiu, Terengganu	3. YB Menteri Sumber Asli, Alam Sekitar dan Perubahan Iklim

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**